

Penganggur cederakan remaja perempuan diperintah jalani bon menjaga keamanan

KUCHING: Mahkamah Majistret di sini semalam memerintahkan seorang penganggur lelaki menjalani bon menjaga keamanan enam bulan, gara-gara mencederakan seorang remaja perempuan berusia 16 tahun.

Majistret Mason Jaro Lenya Barayan menjatuhkan hukuman itu terhadap Fadwan Shah Johari, 30, dari Tawau untuk menjalani bon menjaga keamanan selepas dia mengaku bersalah sebaik didakwa mengikut Seksyen 67 Kanun Tatacara Jenayah.

Berdasarkan keterangan kes, pengadu kes (mangsa) membuat laporan polis menyatakan dia diserang oleh bekas teman lelaki neneknya sehingga menyebabkan luka kecil ibu jari kiri.

Kejadian berlaku pada 31 Januari 2024, sekitar jam 2 petang di sebuah gerai di Jalan Demak Laut, Demak Laut Commercial Center di sini.

Susulan itu, pasukan polis pergi ke alamat tersebut dan menangkap tertuduh sekitar jam 3.23 petang.

Hasil siasatan mendapati telah berlaku konflik antara pengadu dan tertuduh sehingga menyebabkan kecederaan kecil pada ibu jari kiri pengadu.

Difahamkan juga, sebagai pengajaran kepada tertuduh dan untuk mengelak kejadian sebegini berulang, tertuduh diperintahkan untuk menyempurnakan bon bagi menjaga keamanan.

Pendakwa dilakukan oleh Pegawai Pendakwa Inspektor Merylene Lindan Andrew Mang sementara tertuduh tidak diwakili peguam.